

## LISICA JI KOKOŠ

«Lisica ji kokoš, a ja palentu!»  
glas suseda Osipa j tužno drhčal.  
Podbočen na lesu, j z glavun kimal  
I lagacno z luli popel otresal.

«Ni na Božić se nis otel omrsit  
Kako bin dobru moju Žutku zaklal?!  
Črnu parenicu san s palentun jil  
Nis tužil, - va ton je i Božić pasal.

Rani na Stipanje, san se nebog stal  
Otel san v konobi treščic nacipat  
Zoven Žutku – gljedan – kokoši ni  
Lih bura j puhala črez škulju znad vrat.

Gren okol kući i dalje črez potok  
Priden v umejak i siden pod bazak  
Nigdir bogastvora, lih mičo nižje  
Poli gromači okrvavljen pesak.

Na, Žutko, na – gren od grma do grma  
Va ton i na kantanu j zazvonelo  
Na podanki rozak poli kolca  
Krv i peri, se mi sej začrnelo.»

Lisica j rekla: «Žutka j Osipova,  
Va njegovih rozgah ću ju i pojist!»  
«Lisica ji kokoš, a ja palentu –  
do konca vika sujeno mi ju j jist!»